



Messadi per la radunanza communal digls 25 d'avregl 2018

Stimadas votantas, stimos votants

Suandontamaintg az infurmainsa dallas tractandas, tgi vignan discutadas e deliberadas a caschung dalla radunanza communal digls 25 d'avregl 2018.

Protocol dalla radunanza communal digls 14 da december 2017

Digl protocol dalla radunanza communal digls 14 da december 2017 ins ò savia piglier invista u tg'el ò savia neir retratg a parteir digls 22 da december 2017 durant 30 deis an canzleia communal. Ainfer chel termin èn neidas inoltradas nignas protestas. Igl protocol vign damai declaro per approvo e sottascretg digl mastral e digl protocollist.

Lescha d'ustareia aint igl cumegn Albula/Alvra

Chesta lescha regla las lubientschas, las ouras d'avertura scu er las taxas an execuziun d'activitads da hotellareia e gastronomia per mantigneir igl pôss, igl urden e la siertad scu er la protecziun dalla giuventetna. Risguardond tottas determinaziuns legalas (publicas e da dretg privat) pon menaschis fixar sezs lour ouras d'avertura. Schinavant tg'igl mantignamaint digl pôss, digl urden e dalla siertad publica pretendan, pon neir fixadas ouras da sara da spezialas per singuls menaschis u parts digl menaschi. Igl incasso da taxas sa drezza agl reglamaint dalla lescha d'ustareia digl cumegn Albula/Alvra. La suprastanza communal relascha las determinaziuns d'execuziun basignevas. Chesta lescha è sottamessa agl referendum facultativ. La suprastanza communal definescha igl termin dall'antrada an vigour da chesta lescha.

Alvagni: Concept da pastgiras e bavradoirs – Credit brut CHF 575'000.00

Ainten la fracziun d'Alvagni sa cattan las pastgiras communalas da Foppas, Plaun sulla Sesa, Aclas Davains e Aclas Dafora. Per chellas èn neidas pigleidas diversas maseiras igls davos onns per migliurar la pasculaziun. Principalment las intervenziuns forestalas an connex cun la zavrada da gôt e pastgira, on gia per consequenza tgi la qualidad dallas pastgiras è sa migliurada evidentamaintg or da vista agricola. Per impedeir tgi las surfatschas

urbarisadas creschan aint danovamaintg, ègl impurtant da procurar tgi chellas surfatschas vignan pasculadas pi intensiv. Chegl è angal pussebel cun en'amplificaziun digls bavradoirs existents. Sainza en'amplificaziun digls bavradoirs, è la repartiziun dalla pastgira restranscheida, las pastgiras èn per part mengia grondas, uscheia tgi aint igl manevol digls bavradoirs existents exista en suradiever e tar las pastgiras pi lontanias digl bavradoir en sotadiever dallas pastgiras.

Las munscheras existentas dad Aclas, Valiabgias, Curmeagl ed Alp da la Creusch correspondan oz betg allas pretensiuns e prescripziuns dalla legislaziun davart la protecziun digls animals e dallas avas. Ena renovaziun da chels plazs è basignevla urgentamaintg.

Igls costs d'investiziun (bavradoirs e munscheras, incl. costs generals) montan a radond CHF 575'000.00 (incl. TPV). Tenor la posiziun digl Uffezi d'agricultura e geoinformaziun vign rancunascheida l'interessenza agricola davart igl project da construcziun. Resalvond la posiziun digl Uffezi federal d'agricultura pon neir mess an vista contribuziuns an import cumulo da 65% digls costs cun dretg da survagneir contribuziuns. La suprastanza communal propona en credit brut da CHF 575'000.00 per la midada digl concept da pastgiras e bavradoirs ad Alvagni.

Casti/Tiefencastel: Project da rimnada equipaziun ed avertura 2018 – Veia da gôt Fops – Credit brut CHF 575'000.00

Igl project preschaint cuntigna la sanaziun dalla veia da gôt existenta tgi magna da Sisseals (hotel Mistail) anfignen igl reservuar e l'ovra electrica dall'ava da beber digl provedimaint d'ava dalla fracziun da Casti ainten la Val da Rand. La surfatscha totala ainfer igl perimeter digl project monta ca. 34 ha, da chella è l'antiera surfatscha digl gôt zavrada or scu gôt da schurmetg digl tip A. Igl quantum annual e la media dalla lenna tgi vign pigleida or digls gôts e trasportada sen la veia da gôt, monta circa 150 m³. Ve dalla veia da gôt da Fops èn gio neidas pigleidas maseiras da sanaziun igl 2009 e 2012 aint igl rom digl project da rimnada sanaziun equipaziun (RSE). I sa tractava lez mument digl ramplazzamaint resp. dalla sanaziun da diversas construcziuns d'art scu er d'ena sanaziun cumplessiva siva da donns da malora. Igl project preschaint cuntigna ena sanaziun cumpletta (capacitad da tgargia, drenascha dalla veia, construcziuns d'art, larghezza dalla veia sen 3.00 m, scarpas da gôt stabilas) dalla veia da gôt da Fops sen ena lunghezza da 1.14km. Igls costs d'investiziun montan CHF 575'000.00 (incl. TPV). La sanaziun agl rom digls projects annuals da rimnada sanaziun equipaziun vign sustigneida digl Uffezi da gôt e prieveles dalla nateira digl Grischun (UGN/AWN). Igl Uffezi da gôt e prieveles dalla nateira metta an vista contribuziuns an import da 68 %. Per igl cumegn Albula/Alvra dattigl uscheia costs restants da CHF 184'000.00. La suprastanza communal propona da deliberar en credit brut da CHF 575'000.00 per la realisaziun digl project da rimnada sanaziun equipaziun 2018 dalla veia da gôt da Fops.

Concept per l'economisaziun digl rusment „Molok“ – Credit brut CHF 335'000.00

La suprastanza communal prevei d'installar ainten tot las fracziuns posts „unifitgias“ per la rimnada da rusment. La populaziun duess aveir la pussebladad da tot taimp da dismetter cartung, palpieri, ieli da cuschinar vigl, beschlas/aluminium, vèder vigl, vistgadeira, PET e rusment. Per la dismessa da rusment, per part aluminium e vèder, è sa verifitgia igl sistem da molok tgi è gio installo ainten singulas fracziuns. Ad Alvagni vischnanca (molok per vèder, rusment ed aluminium) Bogn d'Alvagni (molok per rusment e vèder) Stierva (molok per rusment) e Vasarauls (molok per rusment e vèder) èn igls posts da rimnada da rusment gio installos correspondentamaintg. Ainten las ulteriouras fracziuns è en grond basigns d'ager different. Cun ena amprega etappa duessan neir installos igls posts da rimnada da rusment a Brienz/Brinzauls e Casti/Tiefencastel ed ainten en'ulterioura etappa igls posts da rimnada da rusment ad Alvaschagn, Mon e Surava. La suprastanza communal Albula/Alvra propona da deliberar en credit brut da CHF 335'000.00 (incl. TPV) per la realisaziun digl concept d'economisaziun digl rusment resp. per l'erecziun da posts da rimnada ainten las fracziuns numnadas.

Casti/Tiefencastel: Sanaziun dalla Veia Cumpogna – Infurmaziun digl rendachint final

A caschung dalla radunanza communal digls 24 da zarcladour 2015 on votantas e votants approvo en credit brut da CHF 898'000.00 per la sanaziun dalla Veia Cumpogna a Casti, davent digl attatg dalla veia viglia cantunala a „Sontg Ambriesch“ anfignen tar igl complex da scola a Cumpogna ed igl parcadi dasper la scola da Cumpogna. Parts integralas da chest project eran mademamaintg igl attatg dalla veia da fons an direcziun „Bot la Cresta“ e l'erecziun nova d'en passagi tranter la scola e la staziun da transfurmaziun. Igl rendachint final mossa en'expensa totala da CHF 390'240.90. La gronda differenza vers igl credit brut tgi era nia concedia ins so declarar suandontamaintg:

- La rasada da fundamaint ò betg stuia neir renovada.
- Las lengias d'ovra on betg stuia neir ramplazzadas, damai tgi ellas eran an bung stadi.